



UNIVERSITÄTS-  
BIBLIOTHEK  
PADERBORN

**Commentarius Pavli Bernriedensis, Antiqui Scriptoris, De  
Vita Gegorii VII. Pontif. Max.**

**Paulus <Bernriedensis>**

**Ingolstadii, 1610**

Gregorius Episcopus Servus Servorum Dei, Vtoni Treuirensi Archiepiscopo  
salutem, & Apostolicam benedictionem.

---

[urn:nbn:de:hbz:466:1-65381](https://nbn-resolving.org/urn:nbn:de:hbz:466:1-65381)

rit, non solum in anima, sed etiam in corpore,  
 Et in omnibus rebus suis vindictam omnipo-  
 tentis DEI sentiat, Et in omni congressione  
 belli nullas vires, nullumq; in vita sua trium-  
 phum obtineat, sed duplici contritione prostra-  
 tus semper vilescat, Et confundatur: ut sic sal-  
 tem ad pœnitentiam redire addiscat.

Præsentium verò portitorem ad hoc vobis  
 dirigimus, ut unà cum venerabili fratre no-  
 stro \* Treuerensi Archiepiscopo, qui Henrico  
 fauet, Et altero, qui utilis Et religiosus ad hoc  
 sit opus, Episcopus ex parte Rodulphi, locum,  
 Et tempus prædicti conuentus statuunt: qua-  
 tenus Legati nostri, quos præfati sumus, secu-  
 rius, Et certius ad vos venire, Et quæ omni-  
 potenti DEO placeant, ipso auxiliante, vobi-  
 biscum valeant perficere. Dat. Romæ VII.  
 Idus Mart. Indictione prima.

\* Vdo Treuir,  
 Archiep.

GREGORIVS EPISCOPVS SER-  
 VVS SERVORVM DEI, \* VTONI TRE-  
 uirensi Archiepiscopo salutem, & Apostoli-  
 cam benedictionem.

\* Vdoni, Rom.  
 Edit.

**Q**VANTA nobis sollicitudo, quantaq;  
 tristitia sit de perturbatione, imò de dis-  
 sidio

Q 3

sidio

sidio regni vestri, olim clarissimi, & potentissimi, in communibus literis, quas hoc in anno ad vos misimus, satis vobis declaratum esse putamus. Verum, quia res de die in diem perniciosius implicari videtur, nobis quoque cura cum nimia anxietate altius in mente figitur. Proinde quidquid nobis super hac re ad praesens melius visum est, quod nostra providentia, vel auctoritate interuenire potuisset, maturare curauimus: quod tua fraternitas literis, quibus illud singulariter scriptum est, plenius cognoscet.

Rogamus igitur, & admonemus prudentiam tuam, in qua multum confidimus, ut secundum tenorem earundem literarum, sine omni dilatione, de causa hac te intromittas, & omnibus tam minoribus, quam maioribus, quoad potes, quid à nobis deliberatū, & qualiter tibi iniunctum sit, notum facias, ut miserante DEO, & adiuantibus his, qui Dominum diligunt, tam feralis discordiae furorem, aut penitus compescere, & (quod maxime optamus) ad plenam pacem reducere possimus: aut, si illud peccatis impredientibus, mi-  
nime

nimè obuenire poterit, saltem nos, in tanto fratrum nostrorum periculo, culpam negligentia declinemus.

Notificato autem consilio, & decreto nostro, & requisitis utrinque responsionibus, ut eam certitudinem, & consensum inueniatis, ne in mittendis legatis nobis dubitandum sit, ordinatis, & confirmatis omnibus, quæ ad prosequendum hoc negotium loco, tempore, vel cæteris conuenientius necessaria sunt: volumus, ut tu, & frater ille, qui tecum huius rei mediator esse debuerit, confestim ad nos veniatis: quatenus cognitis securitatibus, & quæ spes pacis esse debeat, legatos nostros tam sine periculo, quàm sine desperatione fructus laboris, & fatigationis eorum vobiscum mittere valeamus.

Nec durum tibi sit, frater, subire, quod imponimus: quoniam ex quo in Ecclesia locum sacerdotij, & officium suscepisti, nihil DEO dignius, aut animæ tuæ salubrius fecisti, quàm si in hac re nequitiam diabolicæ fraudis elidere, & salutem tot millium hominũ (opitulante DEO) consulere poteris: & si hoc fatigationi tuæ pro  
voto

voto non successerit: tibi tamen apud illum, certa manet retributio, apud quem non infectum reputabitur omne bonum, quod iusta, & perseveranti voluntate concipitur.

Illud tamen à dilectione tua omninò nobis exhiberi volumus, ut etiam si illum alium, quem huius rei mediatorem te habere supra diximus, socium itineris habere non possis: tu tamen ad nos venire nullatenus prætermittas. Præcipimus etiam tibi ex auctoritate beati Petri, ut cui iustitia fauet, tu omninò faueas, & hoc idem facere Clericos, & Laicos, quos poteris, ex parte nostra commoneas. Treua etiam vobis prouisa usque ad quindecim dies post conuentus solutionem illa seruetur. Volumus autem, ut apud Regem diligenter procures, quatenus legati nostri, qui in partibus illis sunt, Bernardus scilicet Diaconus sanctæ Romanæ Ecclesiæ, & Bernardus Massiliensis Abbas, si voluerint, licenter, & securè ad nos redire valeant. Dat. Romæ VII. Id. Mart. Indictione prima.

Treua.  
Numerisic re-  
sistuti ex edit.  
Rom. Decreta.

Anno ab incarnatione Domini M. LXXVIII.  
Pōtificatus verò Domini Gregorij septimi Papæ sexto  
deci-

decimotertio Kal. Decembris, Indictione secunda, cō-  
gregata est Synodus Romæ in Ecclesia S. Saluatoris, in  
qua iurauerunt legati Henrici, & Rudolphi, quisq; pro  
Domino suo, quod nullis dolis colloquium legato-  
rum Sedis Apostolicæ in Teutonico regno habendum  
impedient.

*Epistolar. Gre-  
gorij VII. lib. 6.  
post Epist. 5.  
761.*

Anno ab incarnatione Domini M. LXXIX, men-  
se Februario, Indictione II. Pontificatus verò Domini  
Gregorij septimi Papæ VII. legati Regis Rudolphi su-  
per Henricum proclamauerunt, quod nulli loco, nulli-  
que personæ parens religionem transalpinam conte-  
feret, & conculcaret, neminem debitus honor, vel re-  
nerentia tueretur, & ceu vilia mancipia non modò Sa-  
cerdotes, sed etiam Episcopi, & Archiepiscopi cape-  
rentur, vinculisque manciparentur, partimq; iam tru-  
cidarentur.

*Capitula accu-  
sationis contra  
Henricum.*

Decreuerunt ergò quamplures Concilij, in illius  
tyrannidem gladium Apostolicum debere euaginari:  
sed distulit Apostolica mansuetudo, simul & illud at-  
tendens, quod Petro Albanensi, & Altmanno Battaui-  
ensi Episcopis de eòdem negotio scribens inter cætera  
dicit: *Sic vos utrique parti communes, & ab omni suspicionis  
neruo, quantum in vobis est, cum diuina gratie adiutorio ex-  
hibete immunes, ut iustitia semper, & nullo modo partibus  
faueatis, sicut habetis formam nostram: qui videlicet, post-  
quam iudicium tanti huius negotij in manu B. Petri commis-  
sum est, nihil aliud testibus vobis intendimus, nisi ut per iusti-  
tia semitam incedamus. Ad nullam partem sinceritatem A-  
postolicæ discretionis infleximus, nullis promissionibus, aut  
terroribus cessimus, nec aliud unquam, DEO protegente,  
acturos nos esse confidimus.*

Porro legati Henrici Regis, qui prædictæ querelæ  
R. super

*Iuramentum  
Legatorum  
Henrici.  
a impedimen-  
tis.*

super eundem prolata præstò fuerunt, secundum hunc tenorem iurauerunt: *Legati Domini mei Henrici Regis ad vos venient infra terminum Ascensionis Domini exceptis legitimis<sup>a</sup> sonnis, id est, morte, vel graui infirmitate, vel captione absq; dolo, qui legatos Romana sedis securè ducent, & reducent, & Dominus Rex obediens illis erit in omnibus secundum iustitiam, & iudicium illorum: & hac omnia seruabit absque dolo, nisi quantum ex vestra iussione remanserit. Et hoc iuramus ex præcepto Domini nostri Regis Henrici.*

*Iuramentum  
Legatorum  
Rudolphi.*

Itidem legati Rudolphi Regis iurauerunt, quod sequitur: *Si colloquium ex præcepto vestro constitutum fuerit in partibus Teutonicis, loco & tempore à vobis definito, ante presentiam vestram, vel legatorum vestrorum Dominus noster Rex Rudolphus vel ipse veniet, vel Episcopos, & fideles suos mittet, paratusq; erit iudicium, quod sancta Romana Ecclesia decreuerit de causa regni subire, nulloq; malo ingenio cõuentum, à vobis, siue à vestris Legatis constitutum impedit: Et postquam certum inde vestrum nuncium videbit, de pace statuenda in regno, & confirmanda studebit, vt legatio vestra peruenire ad regni pacem, & concordiam possit. Hac omnia obseruabuntur, in quantum ex vestra licentia remanserit, vel ex impedimento legitimo, scilicet morte, vel graui infirmitate, vel captione, sine dolo.*

Posthæc rursus exiit edictum Apostolicæ benignitatis, quod idcirco ex abundanti ponimus, vt clarescat & sapientibus, & insipientibus principem fuisse Gregorium nostrum in illa beatitudine, de qua Dominus

*Matth. 5.*

*dicit: Beati pacifici, quoniam filij DEI  
vocabuntur.*



GRE.